

Date – 19/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Power Minister Pu F Rodinglana an checkpoint an tihdin ni lovin, anmahni thu in an ding tih Assam Rifles chuan an sawi a, an awmna hmun hrang hranga power supply tih tawp chu pe leh thuai turin thuneitute an ngen tih an sawi.
2. Chief Minister's Running Trophy vawi 13 na - Hnam Lam Intihsiak chu vawiin khan khar a ni.
3. Vice President Jagdeep Dhankar chuan sumdawna atana zirna hman chuan zirna dinhmun a chhe zawngin a nghawng a ti.
4. Prime Minister Narendra Modia chuan vawiin khan chawlhkar khat awl tur Karmayogi Saptah-National Learning Week, New Delhi ah a hawng.

<><><>

AR REBUTTAL

Power & Electricity Minister Pu F Rodinglana Assam Rifles ten hmun hrang hranga an checkpoint a tihdin a nih chungchang chhangin Assam Rifles chuan Minister leh a hote chu an tihdin ni lovin, anmahni thu a ding an ni an ti a, he thil thlen hnuah Mizoram hmun hrang hranga Assam Rifles te awmnaa power supply tihtawp chuan venhimna lama an hnathawh a ti khaihlak thei a, power supply pe leh thuai turin thuneitute an ngen tih an sawi.

Assam Rifles hian he thilthleng chungchang chhanna hi vawiin khan tichhuakin, ni 17 khan ralthuam phur an awm thu intelligence report an dawn hnuah Zokhawsangah Mobile Vehicle Check Post an siam a, helai paltlangtu Pu F Rodinglana leh amah zuitu lirthei 4 chu kaltlangtir phalsak an ni a, amaherawhchu anmahni zawk hi an ding a, helaia thilthleng video-a a lan dan angin, Minister PS pawh a inhrosaa, sipai camera te pawh a chhuhsak a, hemi hnu lawka Assam Rifles te power supllly tihtawp pawh hi tihluh a ni ngeia hriat a ni an ti.

Tun thla ni 12-a Kawlbem a thilthleng chungchang sawiin Assam Rifles chuan, Minister leh a hote hian Assam Rifles checkgate ah chuan dingin an check post thiat turin an ti a, hetah an inbah buainaa sipai zurui ni a sawi chu, a sakhua avanga zu in ngailo leh kum 20 a hnathawh chhunga mi entawntlak a ni an ti a, he sipai hi khaw dangah hruai luiin, Assam Rifles Commander a inrawlh hnuah chhuah a ni leh chauh a ni an ti bawk.

Hemi chungchang kan corr report lo ngaithla ang.

(VC)

Hetihlai hian, Power Minister Pu F Rodinglana chuan ni 12 khan a bial fang chu Kawlbem daiah Assam Rifles sipai pathumin lo tidingin kaltlang an phal lova, a

tidingtu chuan zu a ruih thu a sawi a, churang chuan thu zawhfiah turin police-in an la a, sipai pawh chu case engmah siam loin Police-te'n an chhuah leh a ni a ti a, Ngopa-a an Company Commander hnenah thil awmzia sawiho turin Civil SDO-in ziakin sawm mah se an rawn kal loh thu a sawi bawk.

Minister chuan ni 14 khan Kawlkulh lama bial fang chhonzawm tura Ngopa atanga an chhuak chu Ngopa dai, check point awm ngai lohnaah lo dan an tum leh a, hemi tum hian an tlan tlang lui a, ni 17-a Champhai atanga Aizawl an haw lam chu Bungbanga leh Beraw lui inkar quarry thlen hmaah AR-te chuan kawnglaiah hmun hnihah barrel hmanga kawngdanna an siam bakah spike nail an phah bawk a, an hmaah sipai pathum silai nen an ding bawk tih sawiin, PSO-in thu a zawh chian hnuah an commander thu anga dang an nih thu an hrilh a, eng emaw chen an inhnial buai a, mipui an punkhawm hnuah an Captain chuan chhuah turin a ti a, an tihdin chhan a hriat phawt loh chuan a ding ta tih a tarlang bawk a ni.

He thilthlenga Assam Rifles chet dan hi an dem thu political party leh pawl hrang hrangin an chhuah a, BJP Mizoram chuan he thilthleng chungchang hi sorkar laipuaiah an thlen tih an sawi a ni.

<><><>

HOME MINISTER

Home Minister Pu K.Sapdanga chuan, Sorkarna an chelh hnuin Home Department chhungkuaah tan an la nasa hle a, kalphunghluia hun rei tak a lo kal tawh avangin department chhungah siamthat ngai thil tam tak awmin, an insiam rem mek a ni, a ti.

Mi rinawm leh fel tak tak karah mi inthlahdahte avangin an lo hming that tawhna te pawh thai rehin a awm phah thin tih sawiin Home Minister chuan heng mi inthlahdah, mi rinawm lo te hi sorkar chuan a thian thianghlim nual tawh a, an chungah thununna an lek zel dawn a ti.

Vawiin khan Tuirial constituency chhunga khaw thenkhat a tlawhna-ah thusawiin, Pu K Sapdanga chuan ram leh hnam dam lohna pakhat chu rinawmna hloh a ni thin tih a sawi a. Tunhma chuan zofate chu hnam rinawm, kawngka kalhna a tan pawha thingfak hmang mai thin an ni a, khawvel hmasawmna leh changkannain a luh chhuah hnu hian Sorkar pisa-ah te, ram enkawlina kawngahte, khawtlang inrel bawlinaah te, mahni hna zawn theuhah te rinawmna in hmun a chang tlem ta hle a, tan lak a ngai ta hle a ni, a ti.

Home Minister chuan Ruihhlo avangin ram a rum mek a, chhungkaw tamtak an tap a, thalaite nunna pawh a hek hle a, Mizoram hi ruihhlo tawlhna kawngpui pakhat a ni a, hei hi sorkar thar chuan a ngaimawh tak zet a, Central YMA pawhin theih tawp chhuahin ruihlo do kawngah hma a la mek a ni a ti. Sorkarin a chhinchhiah bikah, kumin chhunga ruihhlo man ringawt pawh cheng vaibelchhe 160 chuang hu a nih tawh thu leh hetiang zela Mizo thalai, a bikin Mizo mipate ruihhlo bawiha an tan chhoh chuan hnam chu a ral zawngin a kal zel ang tih a hlawuhthawnawm hle a, tlawmngai pawlte, Kohhran leh Kohhran thalaite, tumah inthlahdah lovin tang ho zel turin mipui te a ngen a ni.

<><><>

HNAM LAM INTIHSIAK

Art & Culture Department leh Central YMA te tangkawpin an buatsaih Chief Minister's Running Trophy vawi 13 na - Hnam Lam Intihsiak chu vawiin khan Aizawl Dawrpui Multipurpose Centre-ah khar a ni a. Chief Minister Pu Lalduhoma chu khuallian a ni.

Chief Minister Pu Lalduhoma chuan Mihring hi awm reng mahsela hnam ziate a bo si chuan, hnam a bo a ni a ti a. Mizo te tihdan tha tinrengte hi chhawm nung zel a zahpui tur a ni lo a ti a. Kristianna chuan Seki leh Tingtange nena Pathian fak te hi Pathian thu nen pawh a inrem thlap a, kristianna leh Mizo culture hi rem takin a kaldun thei tih a sawi a ni.

Art & Culture Minister Pu C. Lalsawivunga pawhin he hunah hian thusawiin, hnam changkangten hmasawna leh an hnamzia an kal kawptir thiam a, hmasawna ke pen nghet an nei thin a, Kristianna leh hnam ze thate keng tlat chungin hma a sawn tur a ni a, chu chu hmasawna dik chu a ni, a ti a, hnam zia ngaihhlut tlat a tul a ni a ti.

Chief Minister's Running Trophy vawi 13 na - Hnam Lam Intihsiak-ah hian Branch YMA 42 te Khuallam leh Cheraw ah an inel a. A pumpuiah Pakhatna Chanmari West Branch YMA la ni a, pahnihna Vaivakawn Branch YMA an ni.

Cherawah-ah pakhatna Chanmari West Branch YMA, pahnihna Lamka Branch YMA leh pathumna Ramthar Branch YMA te an ni a

Khuallamah hian pakhatna Vaivakawn Branch YMA, pahnihna Chanmari West Branch YMA leh pathumna Pawlrang Branch YMA an ni.

<><><>

FISHERIES

Saitual District Fisheries Department chuan Saitual District huamchhunga Luidung nungchate humhalh kawngah Central YMA te nen inremna an siam bawhzuiin vawiin khan Sub-Head quarters Joint YMA ten Tuivawl Phullen kai an humhalhna hmunah Closed Season Awareness hun an hmang a.

Closed Season hun chung hian lui a sangha leh nungchate man, tihlum, an chenna leh nunphung tihbuai khap a ni.

DFDO Pi Zomuansangi, chuan he Closed Season chhunga sangha inthlahpun hunlaia venhim an nih hian a lehpek zel atan sangha man tur an pun phah tih a sawi a, Closed Season puan chung chuan mitinte insum hram hram turin a chah nghal a ni.

<><><>

VICE PRESIDENT

Vice President Jagdeep Dhankar chuan sumdawna atana zirna hman chuan zirna dinmun a chhe zawngin a nghawng a ti. Vawiina Rajasthan-a Sikar-ah he thu hi sawiin sumdawna atana zirna hman nasat lutuk chu nakina ram hmabak atan a tha lo hle a ti a. Sum lakluhna hnarah zirna hi hman a ni ngai lo tih sawiin inpekna, midang tana malsawmna leh khawtlang nun siam thatna hmanrua a ni thing a ti a. Pu Dhankar-a chuan vawiinah chuan zirna chu sumdawna bungruaah a chang tawh tih sawiin hlep tam tak neih tumin zarwh a ni a, hei hian nasa takin zirna quality a ti chhia a ni a ti bawk..

<><><>

KARMAYOGI

Prime Minister Narendra Modia chuan vawiin khan chawlhkar khat awh tur Karmayogi Saptah-National Learning Week New Delhi ah a hawng. Hapta khat chhung Karmayogi pakhat zelin darkar li tal hnathawhna lama tha lehzial turin zirtirna an dawng dawn a. Akadhvani Correspondent sawidanin he National Learning Week-ah hian mimal emaw Ministry, Deparment leh pawl anga telte chuan sawrkar kalphungah zirna tha tak an dawng dawn a ni. Mission Karmayogi hi kum 2020 September thla khan hawn niin khua leh tuite awn sawrkar inrelbawlina tihhmasawna tura hmalakna a ni a. Sawrkar hnuaia thawktu hrang hrangte hnenah tha zawka hna an thawh theih nan zirna hi pek thin a ni. iGOT platform hmangin course hrang hrang zir theih a ni dawn a. Hemi chhung hian mithiam tak takten zirtirna an pe dawn a ni.

<><><>

PRESIDENT

President Draupadi Murmu-i chuan Malawi chhuahsanin vawiin khan New Delhi alo thleng. President Murmu-i hian Africa ram pathum Algeria, Mauritania leh Malawi te a tlawh a. Kan Correspondent sawidanin tun tuma President-in ram pathum a tlawh avang hian inlaichinna kawngah bung thar kai a ni a. President zingah heng Africa ram pathum tlawh hmasa ber a ni bawk.

<><><>